

ՀԱՅ ԳՐԱԿԱՆՈՒԹՅՈՒՆՆ ՈՒ ԱՐՎԵՍՏԸ ԱՎ. ԻՍԱՀԱԿՅԱՆԻ ԳՆԱՀԱՏՄԱՄԲ

Գ. Ն. ՀՈՎՀԱՆՆԻՍՅԱՆ

Ավ. Իսահակյանի հարուստ ժառանգության մեջ մեծ արժեք են ներկայացնում նրա հուշերը, դրականության ու արվեստի տարրեր հարցերին նվիրված հոդվածները: Իր բազմամյա գործունեության ընթացքում նա գրել է հայ դասական գրողների և արվեստի գործիչների հուշ-դիմանկարներ, անդրադարձել գրականության և արվեստի ամենատարբեր երևույթների ու հարցերի, թողել խորիմաստ բնութագրություններ:

Ում մասին էլ գրել է Իսահակյանը՝ Աբովյանի թե Թումանյանի, Կոմիտասի, Մ. Սարյանի թե Թորամանյանի, Պուշկինի, Շևչենկոյի, Ռուսթավելու կամ Նիզամու, բացահայտել է նրանց արվեստի կենդանի հմայքն ու ինքնատիպ բնույթը: Նրա գրչի տակ գրականության և արվեստի երևույթները պահպանում են իրենց ներգործոն ուժն ու հարստությունը:

Իսահակյանի գրական-տեսական ժառանգության մեջ առանձնապես հետաքրքրական են XIX դ. վերջի և XX դ. սկզբի հայ մշակույթի հարցերը: Ուշագրության կենտրոնում են հավասարապես գրականությունն ու ճարտարապետությունը, երաժշտությունն ու կերպարվեստը:

Ավ. Իսահակյանը միշտ գտնում էր իր ժամանակակիցների արվեստի ուժը և ինքնատիպությունը բացահայտող մեկնակետեր, բնորոշումներ ու որակումներ: Նրա ստեղծած բազմաթիվ դիմանկարների շրջանակներից դուրս են գալիս և ի մի հավաքվում հատկանիշներ, որոնք վերստեղծում են ժամանակաշրջանի գրականության և արվեստի ընդհանուր պատկերը: Իսահակյանի զննող ու իմաստավորող հայացքի տակ ժամանակաշրջանի հայ մշակույթի զարգացումը երևում է իր արմատական օրինաչափությամբ: Նա տեսնում է, թե ինչպես երկու դարերի սահմանագծում այն մի կողմից արմատներ է նետում դեպի ժողովրդի դարերով ավանդած ստեղծագործական արժեքները, մյուս կողմից՝ ազգային նորովի հասակ առնում, վերածնվելով վերահաստատվում, նոր թռիչք գործում:

Իսահակյանի մեկնությամբ Թումանյանի ու Կոմիտասի, Սարյանի ու Թորամանյանի հանճարը խոյացավ ժողովրդի ընդերքից, վերակոչելով ազգային արվեստի ավանդները, տոհմիկ ուրույն երակները, անսպառ հարստությունները: Սա Իսահակյանը համարում էր դարամուտի հայ մշակույթի ամենից ընդհանուր օրինաչափությունը:

Երկու դարի սահմանագծում հայ գրականությունը ներխուժում էր մարդկային կյանքի ընդերքը, լայնացնում էր հունը, ժողովրդայնանում: Այս միտումների կրողն ու իրագործողը պոեզիայում դարձավ Հովհ. Թումանյանը, որ վերակոչեց հայ մշակույթի ժողովրդական տարերքը և առողջ ու ամուր հիմքեր ստեղծեց նրա հետագա զարգացման համար: Իսահակյանի բնորոշ-

մամբ՝ Թումանյանը կերտված էր հայ ժողովրդի նյութից, իր հարազատ աշխարհի մարմնից է մարմին առել նա և հոգուց՝ հոգի:

Այդ հարազատ աշխարհը Թումանյանի համար եղավ հայրենի լոռին. «Այս հոյակապ բնության մեջ, այս՝ ավանդություններով, առասպելներով, հիշատակներով լի չքնաղ սարերում ու ձորերում նա բազմապատկվել էր կյանքով, ապրում էր ամեն մի քարն ու քոլը, ճանաչում էր ամեն մի խորշը, անտառը, աղբյուրը, որոնց հետ նվիրական հուշերով կապված էր իր մանկությունն ու պատանեկությունը: Նա գիտեր նրանց մասին անթիվ զրույցներ, դեպքեր, դրվագներ և գիտեր բովանդակ լռված հինավուրց և նոր պատմություններ բոլոր մանրամասներով»¹:

Այստեղից է բարձրանում ու ձևավորվում Թումանյանի աշխարհաճանաչողությունը, զարմանալիորեն ներդաշնակելով ժողովրդի կենսահայացությանը, ժողովրդական հոգեբանությանն ու մտածողությանը: Եվ միայն այս ճանապարհով է՝ «ժողովրդական արվեստի ճանապարհով, որ անձուկ հայրենիքների և փոքր ժողովուրդների բուսահողից ծնված բանաստեղծները դառնում են համամարդկային մեծություններ, ինչպիսին են Միստրալը և Թումանյանը»²:

Թումանյանը բառացիորեն ապրել ու շնչել է իր ժողովրդի ավանդույթներով, հեքիաթով, զրույցով ու երգով, ճարտարապետական հնամենի կոթողներով: Իսահակյանը վերհիշում է, թե ինչպիսի հոգեկան պահեր է ապրել Թումանյանը Անիում. «Օհանեսը հիացմունքով ու ուշով դիտում էր ամեն մի բեկոր՝ արվեստի կնիք կրող: Լուռ, մտասուզ թափառում էր՝ անցյալի հետ ներքին խոսակցությամբ տարված, կանգնում էր հրաշակերտ շենքերի առաջ, հայացքը լարած նայում էր սյուների, կամարների, քանդակների, ապա աչքերը գոցում և ականջները լարում, կարծես, մի երաժշտություն էր լսում, ոչ սովորական, ոչ այս աշխարհից»³: Նա լսում էր իր ժողովրդի ողբերգական ճակատագրի երաժշտությունը, և նրա բախտի մտահոգությունը տեղ չէր թողնում անհատապաշտական պարապ խաղերի համար գրականության մեջ և արվեստում:

Հայ ժողովրդի մեծ բարեբախտություններից էր այն, որ իր գոյության ամենաողբերգական շրջանում ունեցավ այնպիսի զավակներ, ինչպիսիք են՝ Թումանյանն ու Կոմիտասը, Իսահակյանն ու Սիամանթոն, Վարուժանն ու Տերյանը, Սուրենյանցն ու Սարյանը, Թորամանյանն ու Թամանյանը և շատ ուրիշներ, որոնք նորովի վերակոչեցին մշակութային դարավոր ավանդները, կանխորոշելով գալիքում դրանք ծավալելու լայն հեռանկարներ:

Թումանյանի պոեզիայի ժողովրդայնությունը, Իսահակյանի համոզմամբ, ունեցավ ոչ միայն գրական, այլև պատմական անգնահատելի նշանակություն. Թումանյանը՝ հոգևոր կյանքը պահեց ժողովրդական կյանքի և մտահոգությունների լայն հորիզոնների բովում:

Պոեզիայից անցնելով ավելի լայն ընագծեր, քննելով ընդհանրապես XIX դ. վերջի և XX դ. սկզբի հայ արվեստի երևույթները, Իսահակյանը շեշտում է, որ հանձին Թումանյանի, Կոմիտասի, Սարյանի ու Թամանյանի

¹ Ա. Վ. Իսահակյան, Երկերի ժողովածու, հ. 4, Երևան, 1951, էջ 30:

² Նույն տեղում:

³ Նույն տեղում, էջ 27:

հայոց բանաստեղծությունը և արվեստը ձևավորվում են ներդաշնակելով ժողովրդի աշխարհատեսությանը, ժողովրդական կենսազգացողությանն ու մտածողությանը:

Բնութագրելով Կոմիտասի պատմական դերը ժողովրդի հոգևոր առաջընթացում, Իսահակյանը գրում է. «Նա խառնվեց այդ երգերը ստեղծող ժողովրդի հետ, ներծուլվեց նրա հետ, ներապրեց նրա երգերը և սրտով հասկացավ, որ հայ երգի ոճը թաքնված է ժողովրդի այդ երգերի մեջ... Եվ ցույց տվեց աշխարհին մեր ազգային երգը՝ մաքրված, ինքնուրույն և անաղարտ»⁴: Եվ ապա՝ «Մեր շինականի երգերը՝ աշխատանքի, բնության, սիրո, ուրախության և տխրության, նա բյուրեղացրեց, բարձրացրեց և որպես ազգային մեծարժեք գանձ գրեց մեր ժողովրդի հոյակապ գանձերի՝ ճարտարապետության և Սասունի էպոսի կողքին»⁵:

Կոմիտասի մասին հուշերում Իսահակյանը շեշտում է այն գաղափարը, որ մեծ երգահանի արվեստում հայրենի երկիրը «հավաքվում է» ոչ միայն աշխարհագրական առումով, նրա երգերում խաչմերվում են ոչ միայն վանի, Շիրակի, Արարատյան դաշտի, Մուշի հնչյունները, տյլև խտանում, սինթեզվում է հայ մելոսը իր երկաբաժի՞ պատմական լինելությամբ: Ժողովրդին, ժողովրդի հոգևոր մշակույթի դարավոր ավանդներին հարազատանալով էլ բանաստեղծությունն ու արվեստները ձեռք են բերում այն նշանակությունը, ինչ մատնանշվում է Կոմիտասի վաստակը գնահատելիս. «Նրա երգով մեր ժողովուրդն ավելի գիտակցաբար զգաց իրեն, ավելի կապվեց իրար հետ, ինքնաճանաչեց»⁶:

Իսահակյանի համոզմամբ՝ XIX դ. նախաշեմին Աբովյանի ստեղծագործությամբ ծայր առած ժողովրդի ինքնաճանաչման հունը լայնանում է, իր մեջ առնելով մյուս արվեստները, հոգևոր ողջ մթնոլորտը:

XIX դ. սկզբից հայ իրականության մեջ հետզհետե մեծ թափ է ստանում ժողովրդի հոգևոր գանձերը լայն աշխարհ դուրս բերելու սրբազան գործը: Աբովյանը սկրակ ու բոց որոտաց, և շարժվեց հայ ժողովրդի ներաշխարհը բովանդակ: Հանուրի ճանաչման արժանացավ «Սասնա Մռերը», մոռացությունից հարուստ առան միջնադարյան տաղերգությունը, Սայաթ-Նովան, սկսվեց հայ հոգևոր գանձերի հայտնության և հավաքման մի եռանդուն ժամանակաշրջան: XIX դ. նշանավորվում է միանգամայն մտածված ու հետևողական հետաքրքրությամբ դեպի հայ ժողովրդի գրավոր ու բանավոր դարավոր մշակույթը: Նույն օրինաչափությամբ էր առաջ շարժվում նաև հայ ճարտարապետությունը: Իսահակյանի բնութագրմամբ՝ Թորամանյանը և Թամանյանը ուրվագծում են հայ արվեստի «կառույցը»՝ պատմության խորին ծալքերում նստած իր հիմքով և նոր ժամանակների հետ խոսող ճարտարապետական ոճով: Թորամանյանի մասին նա գրում է. «Նա ընդհուպ մոտեցել էր հայ արվեստի արմատներին, որ գտնվում են հայկական բնաշխարհում. նա պեղել, փորփրել էր, հետազոտել էր հնագույն արմատները, որոնցով սնվել և բարձրացել է հայ մեծ արվեստի շենքը»⁷:

⁴ Նույն տեղում, էջ 33—34:

⁵ Նույն տեղում, էջ 34:

⁶ Նույն տեղում:

⁷ Նույն տեղում, էջ 39:

Ժամանակաշրջանի արվեստների զարգացման մեջ Իսահակյանը ամենուրեք շեշտում է երկմիասնական մի ընթացք՝ ինֆեռանաճանաչումից դեպի ինֆեռանաստաճումը: Նույն տեսանկյունից է նա արժեքավորում Մ. Սարյանի արվեստը, մեկնում ու բացատրում նրա ստեղծագործական, գունային ու ոճական սկզբունքներն ու դավանանքը. «Նրա (Սարյանի—Գ. Հ.) տեսությունը գեղարվեստն իր ընդունված գերազանցորեն ազգային է և որպես այդպիսին միայն իրավունք ունի ապրելու... Առանձին, ուրույն ոճ ու ձև չունեցող արվեստները... սոսկ նմանություններ են, անշահ կրկնություններ և դատապարտված մեղմություն»:

Սա, իհարկե, նաև իրեն՝ Իսահակյանի, գեղագիտական հավատամքն է, որը, հավատարիմ ժողովրդի բանաստեղծական մտածողությանը, հոգևոր դարավոր նստվածքներին, իր ստեղծագործությամբ խթանեց հայ արվեստի ինքնության վերահաստատմանն ու խորացմանը: Արվեստագետը գեղարվեստորեն սինթեզեց, խտացրեց ժողովրդի դարավոր հարստությունները և հաստատեց նրա մեծ ինքնությունը. «Յուրաքանչյուր ազգ,— ավանդել է բանաստեղծը,— պիտի ունենա իր ուրույն, ինքնահատուկ ոճը, միայն ոճ ունեցող ազգերն են ապրում, և շին ջնջվում ոչ ջարդերով, ոչ հրով ու սրով. ոճը ազգի նկարագիրն է: Արարատի ստվերի տակ ապրող ժողովուրդն իր երգով ու իր ճարտարապետությամբ պերճախոս կերպով ցույց է տալիս աշխարհին. որ ինքը դեմք ունի, իր ձևն ունի, իր սեփական-անհատական ըմբռնումն ու առարկայացումը աշխարհի, նրա իրերի և նրա խորհուրդների»⁸:

Իր հոգվածներում Իսահակյանը կարողանում է շղթայել պատմական անցյալը, ներկան և ապագան, ժողովրդի ճակատագիրն ու գրականության հասարակական դերը, այդ ամենը իմաստավորել ժողովրդի, մարդկության զարգացման առաջընթացի դիտակետից:

Բանաստեղծի գնահատմամբ՝ ինչպես բաղմադարյա հայ գրականության, այնպես էլ նոր ժամանակների գրականության իշխող ոգին, «հավերժ շողշողացող բովանդակությունն է եղել, ազատության անշեջ ծարավը, պայքարը, հայրենասիրությունը և մարդկային արժանապատվության հարգանքը»⁹:

Աբովյանի, Նալբանդյանի, Աղայանի, Պռոշյանի, Նար-Գոսի և մյուս գրողների վաստակը գնահատելիս Իսահակյանը ելնում է մի ընդհանուր սկզբունքից՝ գրականության հասարակական մեծ նշանակության ճանաչումից: Հայ գրականության պատմության առանցքը, Իսահակյանի մեկնաբանությամբ, շահախնդրությունն է՝ ժողովրդի ամենաարմատական ու կենսական խնդիրների պաշտպանությամբ: Եվ սա ոչ միայն հասուն տարիների հավատամք էր, այլև տակավին երիտասարդ, հետաքրքրությունները նոր-նոր ճշտող բանաստեղծի սկզբունք:

Նման փաստերը առանձնակի հնչեղություն ու նշանակություն են ստանում մանավանդ այն դեպքում, երբ հայացք ենք գցում իննհարյուրական թվականների գրական-հասարակական ընդհանուր մթնոլորտին, ուր տիրում էր գրականության և արվեստի հասարակական նշանակության արժեքազրկման մտայնություն:

⁸ Մ. Սարյան, Գրառումներ իմ կյանքից, Երևան, 1966, էջ 182:

⁹ «Սովետական գրականություն», 1971, № 1, էջ 138:

¹⁰ Ավ. Իսահակյան, Երկերի ժողովածու, հ. 4, էջ 86:

Բանաստեղծն իր տարերքով և էությամբ ստեղծագործական դեռ վաղ շրջանից անխզելիորեն կապված է եղել ժողովրդի ու դրականության կենսունակ ու մարտունակ ավանդներին:

Կարելի՞ է արդյոք անցնել այն փաստի կողքով, որ դեռևս 1902 թ. նա իր հոգում կրել է Սասնա Մհերի կերպարը մշակելու գաղափարը և տարիներ շարունակ, անգամ ռեակցիայի ծանր օրերին, «ապրել է» ժողովրդի ազատասիրական ձգտումներն ու ուժը կրող Մհերի հետ:

Իսահակյանի հետաքրքրությունը «Սասնա Մհերի» հանդեպ ծայր է առել իննսունական թվականներից և երբեք չի թուլացել: Էպոսի մեջ նա տեսել է ժողովրդի մաքառող, անխորտակելի ոգու խտացումն ու խոյանքը: Այն, ինչ մտորել էր էպոսի շուրջը ողջ կյանքի ընթացքում, այն, ինչ նրա հավատո հանգանակն էր՝ արտահայտվել է «Սասունցի Դավթին» նվիրված քննական հետազոտության էջերում: Իսահակյանի առաջին կարևոր հետևությունն այն է, որ էպոսը ոչ թե փոխանցվել է սերնդից-սերունդ, այլ ապրել է ամեն սերնդի հետ, դարձել ժողովրդի հավաքական, ընդհանրական կերտվածք: Հայոց պատմիչների կողքին, վկայում է Իսահակյանը, մեր ժողովուրդը նրա մեջ հյուսել ու խտացրել է իր բազմադարյա գոյության և լինելիության պատմությունը: Ամեն սերունդ ուժ է տվել էպոսին, և ամեն սերունդ ուժ առել նրանից: Էպոսը դարավոր նստվածքներով ու բյուրեղացումներով պահպանել է ամենաբնորոշը, յուրահատուկը ժողովրդի հոգեբանությունից՝ նրա մաքառող ոգին, որին ժամանակների ամենադաժան փորձություններից չի դիպել վհատության որևէ շորշոփ:

Հայկական էպոսի անգնահատելի արժեքը Իսահակյանը տեսնում է ժողովրդի պատմության խտացումների մեջ, նրա գոյության տարբեր շերտերի ու ծայրերի միաձուլման, ժողովրդի կյանքի ու պատմության ամբողջական ընդգրկման մեջ: «Սասնա Մհերի» դիցաբանական արմատներին վերաբերող Իսահակյանի այս աշխատությունն իր հարցադրումների համակողմանիությամբ մնում է և կմնա իբրև լավագույն ուսումնասիրություններից մեկը հայոց էպոսագիտության մեջ: Այն, ինչ արտահայտվել է էպոսում՝ եղել է ժողովրդի տարերքը, և երբ Իսահակյանն էպոսի վերաբերյալ իր խոհերն ու մտորումները համադրում է հայ գրականության, ճարտարապետության, արվեստի այլ ճյուղերի զարգացման օրինաչափություններին, ապա դրանց միջև հայտնաբերում է մի զարմանալի ընդհանրություն, օրգանական միասնություն:

Իսահակյանի աւբողջ կյանքի համոզմունքը եղել է այն, որ դաժան ճակատագիրը չի թուլացրել ժողովրդին, այլ ավելի ու ավելի է պրկել ու լարել նրա ուժերը, դրսևորվելով հոգևոր մշակույթի բոլոր ճյուղերում: Հայ ժողովրդի և գրականության հանդեպ Իսահակյանի հայացքը՝ ժամանակի հետ համաքայլ ընթացող, ազգային իսկական արժանապատվություն ունեցող արվեստագետի հայացք է: Նրա համար վեհն ու հայրենասիրականը, հպարտությունն ներշնչողը՝ հարազատ ժողովրդի պատմական գոյության լավագույն ավանդների ոգով համընթաց քայլելն է առաջավոր մարդկության հետ. «Հայ ժողովուրդը... գոյության անտեղիտալի կռիվ է մղել և զարհուրելի բախումների մեջ կոտորակվելով և վերստին կոտորակվելով այնուամենայնիվ մնացել է միշտ կանգուն իր նվիրական հողերի վրա, և միշտ հոգով աննվա՞ռ. ա-

դատատենչ և լուսաբաղձ: Իր արյունոտ մաքառման էպոսը կոնկ-կոփել է իր համար Թուր Կայծակին, որ երբեք նա ձեռքից վայր չձգեց...

... հայ ժողովուրդը՝ անմահ ոգով, նորից ոտի է կանգնել բոլոր փլուզումների և կոտորածների միջից, նորից վառել է իր գոյության օջախը իր սրբազան ավերակների վրա, նորից և նորից կերտել է՝ իր նման անմահ մեր քարերին տալով գեղեցկություն և իմաստ, նորից հավերժացրել է իր մագաղաթյա մատյանները: Եվ կերտելով ու ստեղծելով նորից ու նորից իրականացրել է իր ապրելու հոգի կամքը¹¹:

Իսահակյանի այս և նման բնութագրերում ի մի են բերված ժողովրդի կյանքի, պատմության ու մշակույթի ամենակական գծերը: Այդ ընդհանուր նկարագրում ամենուրեք շեշտվում է ազատասիրության և ստեղծագործ աշխատանքի ձգտումը ժողովրդի պատմական գոյության ընթացքում, կյանքում և էնսամբլիստոփայության մեջ:

Այդպիսի սնտիստությունը, ինչպես և ազգային վշտերի մեջ սուղվելն ու թաղվելը, սպեկուլյատիվ աղաղակները անհարիր են իսահակյանական հպարտ ու վեհ հայրենասիրությանը: Իր ժողովրդի ուժերի հանդեպ ունենալով անսպառ հավատ, նա մշտապես խոսում էր նրա կառուցելու, ստեղծելու, մաքրելու, առաջադիմելու ունակություններից:

Ազգային արձանապատվության այս խոր զգացումն էլ հնարավորություն է ստեղծել նրան լիաթոք սիրելու բոլոր ժողովուրդներին, գնահատելու և փայլափայլելու նրանց նյութական ու հոգևոր արժեքները:

Իսահակյանը հայ և ռուս ժողովուրդների բարեկամությունը համարում էր կենսունակ ու հավերժական: Արվեստագետ-քաղաքացին այդ բարեկամության խորհուրդը բացատրում էր նրանով, որ հայ ժողովուրդը իր պատմության տրամաբանությամբ օրինալափորեն պետք է մղվեր դեպի սոցիալական, հասարակական, պատմական այնպիսի արմատական հեղաբեկումների ընդունակ մի ժողովուրդ, ինչպիսին է ռուս ժողովուրդը: Այս ելակետից էլ նա գնահատում էր ռուս ժողովրդի բարեկամական հովանավորությունը, Ռուսաստանին միանալու հայ ժողովրդի դարավոր ձգտումները. «Պետրոս մեծի երևան գալուց սկսած պարսիկ շահերի լծի տակ հյուծվող հայությունը ձգտում էր, երագելով երազում միանալու ռուս նորածագ պետությանը, ընդունելու նրա թևարկությունը: Հայությունը համոզված էր, որ իր անհուն տառապանքներին վերջ կարող է տալ միայն ռուսական զորությունը և նրա իշխանության ներքո հայությունը կսկսի աճել, զարգանալ, մանավանդ մարդկային և ազգային կյանքով ապրել: Այս երազը իրականացնելու համար Կովկասի հայերը ամբողջ մի դար պայքարեցին զենքը ձեռքներին, արյուն թափեցին ռուս զինվորի հետ միասին և հաղթանակեցին»¹²:

Ռուս ժողովրդի հանդեպ Իսահակյանի ունեցած վերաբերմունքը զուգակցվում էր մեծ սիրով դեպի ռուսական գրականությունն ու արվեստը: Նրա կարծիքով՝ XIX դ. ռուս գրականության և արվեստի աննախընթաց վերելքը պայմանավորված էր ժողովրդի ներքին կարողությունների կուտակման հզորություններով: Խոսելով Պուշկինի մասին, շեշտելով նրա ստեղծագործության խորությունն ու ապոլոնյան հմայքը, գրում է. «Ժողովրդի հանճարը ծնվում է

¹¹ Նույն տեղում, էջ 192—193:

¹² Նույն տեղում, էջ 118:

Ժողովրդի թանձրության ճնշումից, ինչպես ադամանդը քարածուխի ճնշումից՝
 եվ այդ ադամանդը ժողովրդի զգացմունքների, նրա տենչերի, երազների, նրա
 տառապանքների, նրա զայրույթների և կամքի խտացումն է և կոնկրետա-
 ցումը»¹³։

Պուշկինի ստեղծագործության մեջ նստվածքներ են տվել ժողովրդի լեռ-
 նացող ազատասիրության ու ցասման տրամադրությունները։ «Պուշկինն
 ազատատենչ, ըմբոստ ոգի էր, բռնկած իր ժամանակի ժողովրդասեր, հեղա-
 փոխական և առաջադեմ դադափարներով, որով նա անհավասար պայքարի
 մեջ էր ցարական դեսպոտիզմի և զնվականության դեմ, այն խավարամիտ,
 ուսակցիոներ դարի դեմ»¹⁴։

Մեծ բանաստեղծները բորբոքում են կրակոտ դադափարների բռնկում-
 ներ, ասում է Իսահակյանը Տ. Մեչենկոյի մասին. նա «հրդեհ վառեց ուկրաի-
 նական աղնիվ ժողովրդի սրտում՝ ազատության, հերոսության, անձնազոհու-
 թյան հրդեհ... Այդ հրդեհն այրեց, մոխիր դարձրեց ամեն տեսակի բռնու-
 թյունները»¹⁵։

Ամենատարբեր առիթներով Իսահակյանը նշել ու շեշտել է ուս առա-
 ջավոր գրականության մարդասիրական և ազատասիրական բովանդակու-
 թյունը։ Պուշկինը, Լերմոնտովը, Գոգոլը, Դոստոևսկին, Զեխովը նրա համար
 եղել են ներշնչանքի մշտական աղբյուր։ Այդ սերը տարածվել է ընդհանրա-
 պես Ռուսաստանի՝ նրա արձակ ու անծայր բնաշխարհի, ժողովրդի հոգևոր
 նկարագրի վրա։

Իսահակյանի համակրանքներն ու սպասումները նոր լիցք են ստանում
 հատկապես հեղափոխական փոթորիկների տարիներին։ Հեղափոխության
 վիթխարի «պայթուցիկ նյութի խտացումը» Ռուսաստանում մեծ բեկումներ
 էր խոստանում մարդկությանը։

Բնութագրելով ինհարյուրական թվականների իրավիճակը, նա արձա-
 նագրում է, որ «Ռուսաստանը քաղաքականապես, տնտեսապես և մտավորա-
 պես հասունացել էր՝ ներուժ, մեծածավալ գոտեմարտի՝ ցարիզմի ու երիտա-
 սարդ ուս կապիտալի հետ, նրանց փլատակների վրա բարձրացնելու ազատ,
 երջանկացնող մի նոր իրավակարգ»¹⁶։

Ծայր էր առնում երիտասարդ ուսական պրոլետարիատի գրոհի և փո-
 թորկի ահեղ ժամանակաշրջանը։ Հասարակական-սոցիալական այս պատ-
 վանդանի վրա է Իսահակյանը դիտում հեղափոխության մրկահավի՛ն՝ Մաք-
 սիմ Գորկուն, գնահատում նրա ստեղծագործության նշանակությունը. «Որպես
 ումանտիկ նա պրոլետարիատի և ամբողջ աշխարհի աչքերի առաջ հայելաց-
 րեց ապագա սոցիալիստական երջանիկ աշխարհը, ազատ, արդար և մարդ-
 կային բարձր կոչման վայել նոր կյանքը»¹⁷։

Ժողովուրդների պատմության, գրականության մեջ և արվեստում ամե-
 նաթանկն ու արժեքավորը, նրա ըմբռնմամբ, հասարակական առաջադիմու-

¹³ Նույն տեղում, էջ 106։

¹⁴ Նույն տեղում, էջ 105։

¹⁵ Նույն տեղում, էջ 129։

¹⁶ Նույն տեղում, էջ 146։

¹⁷ Նույն տեղում, էջ 147։

թյան սրբազան ավանդներն են: Եվ առաջադիմության ու ազատության համար մղված պայքարում է զոդվել ու ամրապնդվել ռուս և անդրկովկասյան ժողովուրդների բարեկամությունն ու համագործակցությունը:

Իբրև մեծ քաղաքացի բանաստեղծը չափազանց խորն էր գիտակցում վրաց, ադրբեջանական ու հայ ժողովուրդների միասնության և բարեկամության նշանակությունը: Դարասկզբին ցարական կառավարությունը ջանք չէր խնայում ազգամիջյան կռիվներ հրահրելու անգրկովկասյան ժողովուրդների միջև: Իսահակյանը մեկն էր այն գրողներից, որ բոլոր միջոցներով պաշտպանում էր Լոռայական ժողովուրդների անհաղթ միասնությունը՝ ընդդեմ ազգամիջյան թշնամանքի ու հալածանքների: Նա ապրում էր այն համոզմամբ, որ անգրկովկասյան ժողովուրդներն իրենց դարավոր պատմության բոլոր հանգույցներում կապված են եղել միասնական շահերի ու համագործակցության նվիրական ավանդներով:

Տեղին է նկատել Կոնստանդին Գամսախուրդիան. «Հայերի և վրացիների իսկական եղբայրական զգացումները զոդել են ոչ միայն Իլյա Ճավճավաձեն և Ակակի Մերեթելին: Հայ ժողովրդի հանճարը ծնել է իր գրականության երեք մեծ պատգամախոսներին՝ Հովհաննես Թումանյանին, Դերենիկ Դեմիրճյանին և Ավետիք Իսահակյանին, որոնք անկեղծ սիրով հիշեցնում էին մեր ժողովուրդներին, որ Քարթլոսը և Հայկը եղբայրներ են եղել»¹⁸:

Վարպետը ճշմարիտ պատգամախոսի առաքելությամբ է նայել հայ և մյուս ժողովուրդների բարեկամությանը, նրա ազգային մտահոգությունները, ժողովրդին ծանր վիճակից ելք գտնելու որոնումները երբեք պատենելի չեն եղել նեղ սահմաններում: Հայրենական պատերազմի տարիներին, երբ ֆաշիստական գաղափարախոսները միտում էին սեպ խրել սովետական ժողովուրդների միջև, Իսահակյանը հավաստում էր. «Կովկասի եղբայրական ժողովուրդները՝ վրացի, ադրբեջան և հայ միասին, մի կամքով ու մի բազկով կռվել են Շահ-Աբասի անգութ հրոսակների և ավերումների դեմ, արյունոտ աղա-Մահմեդ խանի արշավանքի դեմ...»

Մեր երկնահույ լեռները՝ տակավին հազարամյակներ առաջ ականատեսներ են մեր նախահայրերի եղբայրական միակամ սխրագործություններին»¹⁹:

Իսահակյանը ծիծաղելի է համարել հայ ժողովրդի կենսական հարցերը ազգային կեղևում լուծելու ճիգերը: Անգրկովկասյան ժողովուրդների հետ միասին՝ համառուսական շարժումներին աջակցելը, համագործակցությունը մյուս ժողովուրդների հետ, նա համարում էր հայ ժողովրդի գոյության ու առաջընթացի միակ հուսալի պատվարը: Մարդկության մեծ ճանապարհի ուղեգիծը, բանաստեղծի համոզմամբ, եղել է պայքար հանուն սոցիալական-քաղաքական ազատության ամեն կարգի բռնությունից: Նրա կուռ և ամբողջական մեկնությամբ՝ մարդկությունն անընդմեջ անցել է մաքառումների, ընդվրդումների, բողոքի ու ցասման ճանապարհով: Եվ պատմության զարգացման այդ տենդենցները բացահայտելու մեջ էլ նա տեսնում էր գրականության ու արվեստի ուժն ու նշանակությունը:

¹⁸ Մեք է բերված Գ. Կանկավայի ավտոգրաֆից («Аветик Исаакян и грузинская литература», Тбилиси, 1960, стр. 5).

¹⁹ Ավ. Իսահակյան, Երկերի ժողովածու, հ. 4, էջ 197